

四庫全書

子部

欽定四庫全書

子部
聞見錄卷一至四

評校官監察御史臣邱文愷

侍讀臣孫球覆勘

總校官進士臣繆琪

校對官中書臣王家賓

謄錄監生臣楊景猷

欽定四庫全書

子部十二

聞見錄

小說家類一 雜事之屬

提要

臣等謹案聞見錄二十卷宋邵伯溫撰伯溫字子文邵子之子猶及見元祐諸耆舊故於當時朝政具悉端委是書成於紹興二年前十六卷記太祖以來故事而於王安石新法始末及一時同異之論載之尤詳其論洛蜀

朔三黨相攻惜其各立門戶授小人以間又
引程子之言以為變法由於激成皆平心之
論其記燈籠錦事出文彥博之妻於事理較
近其記韓富之隙由撤簾不由定策亦足以
訂強至家傳之訛周必大跋呂獻可墓誌謂
伯溫是書頗多荒唐凡所書人及其歲月鮮
不差悞殆好惡已甚之詞不盡然也十七卷
多記雜事其洛陽永樂諸條多寓麥秀黍離

之感十八卷至二十卷皆記邵子之言行而
殤女轉生黑猿感孕意欲神奇其父轉涉妖
誣又記邵子之言謂老子得易之體孟子得
易之用文中子以佛為西方聖人亦不以為
非似乎附會至投壺一事益猥瑣不足紀蓋
亦擇焉不精者取其大旨可爾乾隆四十三
年三月恭校上

總纂官臣紀昀臣陸錫熊臣孫士毅

總校官臣陸費墀

聞見錄自序

易曰君子多識前言往行以畜其德孟子曰則聞而知之則見而知之伯溫以先君子之故親接前輩與夫侍家庭居鄉黨遊宦學得前言往行為多以畜其德則不敢當而老景侵尋偶負後死者之責類之為書曰聞見錄尚庶幾焉紹興二年十一月十五日甲子河南邵伯溫書

欽定四庫全書

聞見錄卷一

宋 邵伯溫 撰

太祖微時遊渭州潘原縣過涇州長武鎮寺僧守嚴者
異其骨相陰使畫工圖於寺壁青巾褐裘天人之相也
今易以冠服矣自長武至鳳翔節度使王彥超不留復
入洛枕長壽寺大佛殿西南角柱礎畫寢有藏經院主
僧見赤蛇出入帝鼻中異之帝寤僧問所向帝曰欲見
柴太尉於澶州無以為資僧曰某有一驢子可乘又以

錢幣為獻帝遂行柴太尉一見奇之留幕府未幾太尉為天子是謂周世宗帝與宣祖俱事之南征北伐屢建大功以至受禪萬世之基實肇於澶州之行帝即位盡召諸節度入覲宴苑中諸帥爭起論功惟彥超獨曰臣守藩無效願納節備宿衛帝喜曰前朝異世事安足論彥超之言是也從容問彥超曰卿當日不留我何也彥超曰涔蹄之水不足以澤神龍帝若為臣留則安有今日帝益喜曰獨令汝更作永興節度一任長壽寺僧亦

召見帝欲官之僧辭乃以為天下都僧錄歸洛今永興
有彥超畫像長壽寺殿中亦有僧畫像皆偉人也嗚呼
聖人居草昧之際獨一僧識之彥超雖不識及對帝之
言自有理異哉

周世宗死恭帝幼冲軍政多決於韓通並掌軍政通愚
愎將士多離叛太祖英武有度量智略多立戰功故皆
愛服歸心焉將北征京師之人喧言出軍之日當立點
檢為天子富室或挈家逃匿他州太祖聞之懼密以告

家人曰外間詢詢如此奈何太祖姑即魏氏長公主面如鐵色方在廚引麪杖逐太祖曰大丈夫臨大事可否當自決乃於家間恐怖婦女何為耶太祖默然而出

太祖初登極時杜太后尚康寧與上議軍國事猶呼趙普為書記嘗勞撫之曰趙書記且為盡心吾兒未更事也太祖待趙韓王如左右手御史中丞馬德驥劾奏普強占市人第宅聚斂財賄上怒叱之曰鼎鑪尚有耳汝不聞趙普吾之社稷臣乎命左右曳於庭數匝徐復冠

召升殿曰後當改姑赦汝勿令外人聞也

太祖將受禪未有禪文翰林學士承旨陶穀在旁出諸懷中進曰已成矣太祖繇是薄其為人穀墓在京師東門外覺昭寺已洞開空無一物寺僧云屢掩屢壞不曉其故張舜民曰陶為人輕險嘗自指其頭謂必戴貂蟬今髑髏亦無矣

太祖初受天命誅李筠李重進威德日盛因問趙普自唐季以來數十年間帝王凡易十姓兵革不息生靈塗

地其故何也今天下欲定長久之計其道如何普曰陛下言及此天下之福也唐季以來戰爭不息興廢無常者無他節鎮太重君弱臣強而已今欲治之惟稍奪其權制其錢穀收其精兵則天下安矣語未卒帝曰卿勿復言吾已悉矣頃之上因晚朝與故人石守信王審琦飲酒帝屏左右謂曰吾資爾曹之力多矣念爾之功不忘然為天子亦大艱難殊不若為節度使之樂吾今終夕未嘗敢安枕而卧也守信等問其故帝曰此豈難知

所謂天位者衆欲居之爾守信等皆頓首曰陛下何為
出此言今天命已定誰敢復有異心上曰不然汝曹雖
無此心其如麾下之人欲富貴者何一旦以黃袍加汝
之身汝雖欲不為其可得乎守信等泣涕曰臣愚不及
此惟陛下哀憐示以可生之塗上曰人生如白駒過隙
耳所謂富貴不過欲多積金錢厚自娛樂使子孫顯榮
耳汝曹何不釋去兵權擇便好田宅市之為子孫立永
久之業多置歌兒舞女日飲食相懽以終天命君臣之

間兩無猜嫌上下相安不亦善乎守信等皆拜謝曰陛下念及此所謂生死而肉骨也明日皆稱病乞解兵權上許之皆以散官就第賜賚甚厚或與之結為婚姻置易制者使主親軍其後又置轉運使通判使主諸道錢穀收天下精兵以備宿衛而諸功臣亦以善終子孫富貴迄今不絕向非韓王謀慮深長太祖深明果斷天下無復太平之日矣聖賢之見何其遠哉世謂韓王為人陰刻當其用事時以睚眦中傷人甚多然子孫至今享

福祿國初大臣鮮能及者得非安天下功大乎

太祖遣曹彬伐江南臨行諭曰功成以使相為賞彬平江南歸帝曰今方隅未服者尚多汝為使相品位極矣豈肯復戰耶姑徐之更為吾取太原因密賜錢五十萬彬怏怏而退至家見錢布滿室乃歎曰好官亦不過多得錢耳何必使相也嗚呼太祖重惜爵位如此孔子稱惟名與器不可以假人太祖得之矣

祖宗開國所用將相皆北人太祖刻石禁中曰後世子

孫無用南士作相內臣主兵至真宗朝始用閩人其刻
不存矣嗚呼以藝祖之明其前知也漢高祖謂吳王濞
曰後五十年東南有亂者非汝耶然天下一家慎無反
已而果然藝祖亦云

太祖即位之初數出微行以偵伺人情或過功臣之家
不可測趙普每退朝不敢脫衣冠一日大雪向夜普謂
帝不復出矣久之聞叩門聲普出帝立風雪中普惶懼
迎拜帝曰已約晉王矣已而太宗至共於普堂中設重

裋地坐爇炭燒肉普妻行酒帝以嫂呼之普從容問曰
夜久寒甚陛下何以出帝曰吾睡不能著一榻之外皆
他人家也故來見卿普曰陛下小天下耶南征北伐今
其時也願聞成算所向帝曰吾欲下太原普默然久之
曰非臣所知也帝問其故普曰太原當西北二邊使一
舉而下則二邊之患我獨當之何不姑留以俟削平諸
國則彈丸黑子之地將無所逃帝笑曰吾意正如此特
試卿耳遂定下江南之議帝曰王全斌平蜀多殺人吾

今思之猶耿耿不可用也普於是薦曹彬為將以潘美副之明日命帥彬與美陞對彬辭才力不迫乞別選能臣美盛言江南可取帝大言諭彬曰所謂大將者能斬出位犯分之副將則不難矣美汗下不敢仰視將行夜召彬入禁中帝親酌酒彬醉宮人以水沃其面既醒帝撫其背以遣曰會取會取他本無罪只是自家著他不得蓋欲以恩德來之也是故以彬之厚重美之明銳更相為助令行禁止未嘗妄戮一人而江南平皆帝仁聖

神武所以用之得其道云

太祖初即位朝太廟見其所陳籩豆簠簋則曰此何等物也侍臣以禮器為對帝曰我之祖宗寧曾識此命徹去亟令進嘗膳親享畢顧近臣曰却令設向來禮器俾儒士輩行事至今太廟先進牙盤後行禮康節先生嘗曰太祖皇帝其於禮也可謂達古今之宜矣

東京唐汴州梁太祖因宣武府置建昌宮晉改曰大寧宮周世宗雖加營繕猶未如王者之制太祖皇帝受天

命之初即遣使圖西京大內按以改作既成帝坐萬歲
殿洞開諸門端直如引繩則歎曰此如吾心小有邪曲
人皆見矣帝一日登明德門指其榜問趙普曰明德之
門安用之字普曰語助帝曰之乎者也助得甚事普無
言

太祖登極未久杜太后上仙初從宣祖葬國門之南奉
先寺後命宰相范質為使改卜未得地質罷更命太宗
為使遷奉於永安陵又欲遷遠祖於西京之穀水蓋宣

祖微時葬也相並兩冢開壙皆白骨不知辨遂即墳為園歲遣官並祭洛人謂之一寢二位云伊川先生程頤曰為並葬擇地者可以謂之智矣

太祖獵近郊所御馬失帝躍以下且曰吾能服天下矣一馬獨不馴耶即以佩刀刺之既而悔曰吾為天子數出游獵馬失又殺之其過矣自此終身不復獵

太祖朝晉邸內臣奏請木塲大木一章造器用帝怒批其奏曰破大為小何若斬汝之頭也其木至今在半枯

朽不動嗚呼太祖於一木不忍暴用以違其材况大者乎

忠正軍節度使王審琦與太祖皇帝有舊為殿前都指揮使禁中火審琦不待召領兵入救臺諫官有言罷歸壽州本鎮朝辭太祖諭之曰汝不待召以兵入衛忠也臺臣有言不可不行第歸鎮吾當以女嫁汝子承衍者召承衍至則已有婦樂氏辭帝曰汝為吾壻吾將更嫁樂氏以御龍直四人控御馬載承衍歸遂尚秦國大長

公主樂氏厚資嫁之帝謂承衍曰汝父可以安矣審琦
歸鎮七年率先諸鎮納節以使相薨追封秦王謚正懿
承衍官至護國軍節度使駙馬都尉河中尹薨贈中書
令追封鄭王嗚呼太祖駕御英雄聽納言諫聖矣哉

偽蜀孟昶以降王入朝舟過眉州湖灤渡一宮嬪有孕
昶出之祝曰若生子孟氏尚存也後生子今為孟氏不
絕昶治蜀有恩國人哭送之至犍為別去因號曰蜀王
灘蜀初平呂餘慶出守太祖諭曰蜀人思孟昶不忘卿

官成都凡昶所權稅食飲之物皆宜罷餘慶奉詔除之蜀人始欣然不復思故主矣

真宗景德元年契丹入寇犯澶淵京師震動當時大臣有請幸金陵幸蜀者左相畢文簡公病不出右相寇萊公獨勸帝親征帝乃決遂幸澶淵帝初不欲過河寇公力請高瓊控帝馬渡浮梁帝登城六軍望黃屋呼萬歲聲動原野士氣大振帝每使人覘萊公動息或曰寇準晝寢鼻息如雷或曰寇準方命庖人斫鱠帝乃安既射

死敵驍將順國王達蘭敵懼請和帝令擇重臣報聘萊公遣侍禁曹利用上曰凡敵所須即許之萊公戒之曰若許過三十萬金幣吾斬若矣和議成諸將請設伏邀擊可使敵匹馬不返萊公勸帝勿從縱契丹歸國以保盟好帝回鑾每歎萊公之功王欽若譖之曰陛下知博乎錢輸將盡取其餘盡出之謂之孤注陛下寇準之孤注也尚何念帝聞之驚甚萊公眷禮遂衰

真宗東封西祀禮成海內晏然一日開太清樓宴親王

宰執用仙韶女樂數百人。有司以宮嬪不可視外於樓前起彩山幃樂聲若出於雲霄間者。李文定公丁晉公坐席相對。文定令行酒。黃門密語晉公曰：「如何得倒了？」假山晉公微笑。上見之，問其故。晉公以實對。上亦笑。即命女樂列樓下，臨軒觀之。宣勸益頻。文定至，霑醉。

章獻明肅太后成都華陽人。少隨父下峽，至玉泉寺有長老者，善相人。謂其父曰：「君貴人也。」及見后，則大驚曰：「君之貴，以此女也。」又曰：「遠方不足留，盍遊京師乎？」父以

貧為辭長老者贈以中金百兩后自家至京師真宗判南衙因張耆納后宮中帝即位為才人進宸妃至正位宮闈聲勢動天下仁宗即位以太皇太后垂簾聽政玉泉長老者已居長蘆矣后屢召不至遣使就問所須則曰道人無所須也玉泉寺無僧堂長蘆寺無三門后其念之后以本閣服用物下兩寺為錢建獨長蘆寺臨江門起水中既成輒為蛟所壞后必欲起之用生鐵數萬斤疊其下門乃成蓋蛟畏鐵也今玉泉寺僧堂梁記曰

后所建云

聞見錄卷一

欽定四庫全書

聞見錄卷二

宋 邵伯溫 撰

仁宗好用道引術理髮有宮人能之號曰梳頭夫人一日帝退朝命夫人理髮嬪御列侍帝袖中有章疏左右爭取之帝不能止有從旁讀者蓋臺臣乞放宮女章也衆聞之默然獨梳頭夫人歎息曰今京師富人尚求妾媵豈有天子嬪御外臣敢以為言官家亟逐言者則清淨矣帝不語既御膳幸後苑命內侍按宮人籍上自出

若干人行臺臣之言也梳頭夫人以入宮久首出之帝亦不問或謂叅知政事吳奎曰上比漢文帝奎對以此則曰過文帝遠矣

仁宗朝程文簡公判大名府時府兵有肉生於背蜿蜒若龍伏者文簡收禁之以其事聞仁宗謂宰輔曰此何罪也令釋之後其兵以病死嗚呼肉龍生於兵之背妖也帝釋之德足以勝妖矣兵輒死宜哉

孫文懿公為翰林學士撰升祔李太后赦文曰章懿太

后丕擁慶羨寔生眇冲顧復之恩深保綏之念重神馭
既往仙遊斯邈嗟乎為天下之母育天下之君不逮乎
九重之承顏不及乎四海之致養念言一至追慕增結
仁宗覽之感泣彌月公自此遂叅大政帝問文懿曰卿
何故能道朕心中事公曰臣少以庶子不齒於兄弟不
及養母以此知陛下聖心中事上為之流涕先是晏元
獻公撰章懿太后神道碑曰五嶽崢嶸崑山出玉四溟
浩渺麗水生金蓋以明肅太后為尊也學士大夫嘉其

善比獨仁宗不悅

伯溫嘗得老僧海妙者言仁宗朝因赴內道場夜聞樂聲出雲霄間帝忽來臨觀久之顧左右曰衆僧各賜紫羅一疋僧致謝帝曰來日出東華門以羅置懷中勿令人見恐臺諫有文字論列嗚呼仁宗以微物賜僧尚畏言者此所以致太平也海妙又言嘗觀仁宗二十許歲時祀南郊回坐金輦中日初出面色與金光相射真天人也因以記之

仁宗一日幸張貴妃閣見定州紅瓷器帝堅問曰安得此物妃以王拱辰所獻為對帝怒曰嘗戒汝勿通臣僚饋送不聽何也因以所持拄斧碎之妃愧謝久之乃已妃又嘗侍上元宴於端門服所謂燈籠錦者上亦怪問妃曰文彥博以陛下眷妾故有此獻上終不樂後潞公入為宰相臺官唐介言其過及燈籠錦事介雖以對上失體遠謫潞公尋亦出判許州蓋上兩罷之也或云燈籠錦者潞公夫人遺張貴妃公不知也唐公之章與梅

聖俞書竄之詩過矣嗚呼仁宗寵遇貴妃先於六宮其責以正禮尚如此可謂聖矣

仁宗朝王安石為知制誥一日賞花釣魚宴內侍各以金樸盛釣餌藥置几上安石食之盡明日帝謂宰輔曰王安石詐人也使誤食釣餌一粒則止矣食之盡不情也帝不樂之後安石自著日錄厭薄祖宗於仁宗尤甚每稱漢武帝其心薄仁宗也故一時大臣富弼韓琦文彥博皆為其詆毀云

仁宗時一日天大雷震帝衣冠焚香再拜退坐靜思所以致變者不可得偶後苑作匠進一七寶枕屏遽取碎之嗚呼帝敬天之威如此其當太平盛時享國長久宜矣至熙寧大臣以天變不足畏說人主以成今日之禍悲夫

仁宗御馬有名玉逍遙者馬色白其乘之安如輿輦也圉人云馬行步有尺度徐疾皆中節馭者行速則以足攔之一日燕王借乘即長鳴不行王怒還之帝父事王

甚恭配南城馬鋪久之復奉御其行如初帝升遐從葬至陵下悲鳴不食而斃伊川先生程頤謂伯溫曰驥不稱其力稱其德也歟

本朝祖宗以來進士過省赴殿試尚有被黜者遠方寒士殿試下貧不能歸多至失所有赴河而死者仁宗聞之惻然自此殿試不黜落雖雜犯亦收之末名為定制可以謂之仁矣

仁宗至和間不豫昏不知人者三日既愈自言夢行荆

棘中周章失路有神人被金甲自天而下謂帝曰天以
陛下有仁心錫一紀之壽帝曰吾何當歸神人曰請以
臣之車輅相送帝登車問神人何人曰臣所謂葛將軍
者帝寤令檢案道藏果有葛將軍主天門事因增其位
號於大醮儀中立廟京師帝自此御朝即拱默不言大
臣奏事可即肯首不可即搖首而時和歲豐百姓安樂四
夷賓服天下無事蓋帝知為治之要任宰輔用臺諫畏
天愛民守祖宗法度時宰輔曰富弼韓琦文彥博臺諫

曰唐介包拯司馬光范鎮呂誨云嗚呼視周之成康漢之文景無所不及有過之者此所以為有宋之盛歟仁宗初納光獻后后有疾國醫不效帝曰后在家用何人醫后曰妾隨叔父官河陽有疾服孫用和藥輒效尋召用和服其藥果驗自布衣除尚藥奉御用和自此進用用和本衛人以避事客河陽善用張仲景法治傷寒名聞天下二子奇兆皆登進士第為朝官亦善醫仁宗初升遐禁中永昌郡夫人翁氏會有私身韓億者

自言嘗汲水仁宗見龍繞其身因幸之留其釧復遺以物為驗遂稱有娠既踰期不產按驗皆蠱之詐得其釧於佛閣土中乃蠱自埋也翁氏削一資杖韓蠱配尼寺為童初執政請誅之光獻太后曰置蠱於尼寺欲令外人盡知其詐若殺之則必謂蠱寔生子也英宗初載光獻后垂簾同聽政其決事之明類如此

仁宗皇帝嘉祐八年三月二十九日升遐遺詔到洛伯溫時年七歲尚記城中軍民以至婦人孺子朝夕東向

號泣紙烟蔽空天日無光時舅氏王元脩自京師過洛
為先公言京師罷市巷哭數日不絕雖乞丐者與小兒
皆焚紙錢哭於大內之前又有周長孺都官赴劔州普
安知縣行亂山中見汲水婦人亦載白紙行哭嗚呼此
所謂百姓如喪考妣者歟

熙寧初仁宗幼女下嫁錢景臻京師父老知其為仁宗
女也隨其車咨嗟泣涕元祐中契丹主謂本朝使人曰
寡人年少時事大國之禮或未至蒙仁宗加意優容念

無以為報自仁宗升遐本朝奉其御容如祖宗已而泣
蓋北主為太子時雜入國使人中雄州密以聞仁宗召
入禁中俾見皇后待以厚禮臨歸撫之曰與汝一家也
異日惟盟好是念生靈是愛故北主感之嗚呼帝上賓
既久都人與北主追慕猶不忘此前代所無也

英宗山陵有輦官畢達哭慟於仁宗永昭陵下曰臣事
陛下四十餘年得服役天上死不恨是夕達暴卒韓魏
公為司馬溫公云

永安霍道全者嘗為三陵壕寨年踰九十坐丁謂移永定陵皇堂事羈管亳州道全言地中宿藏物多驗毫人神之遇赦歸永安嘉祐七年道全忽歷遍川原觀地形語人曰此地將有大役明年仁宗升遐初卜陵有司召問之道全曰今永安地吉宜徙以為陵寢有司疑其欲騷動縣人凡所言皆不用道全亦相繼卒今永昭陵既成或曰地名和兒原非佳兆後三年英宗晏駕

元豐中神宗做漢原廟之制增築景靈宮先於寺觀迎

諸帝后御容奉安禁中涓日以次備法駕羽衛前導赴
宮觀者夾路鼓吹振作教坊使丁仙現舞望仁宗御像
引袖障面若揮淚者都人父老皆泣下嗚呼帝之德澤
在人深矣

聞見錄卷二

欽定四庫全書

聞見錄卷三

宋 邵伯溫 撰

英宗於仁宗為姪宣仁后於光獻為甥自幼同養禁中
溫成張妃有寵英宗還本宮宣仁還本宅溫成薨而竟
無子一日帝謂光獻曰吾夫婦老無子舊養十三

英宗
行次

滔滔

宣仁
小字

各已長立朕為十三后為滔滔主婚使相娶

嫁時宮中謂天子娶婦皇后嫁女云蓋仁宗光獻以英
宗為子聖意素定矣此殆天命非人力也至召英宗為

皇子入謝帝與后適御後苑迎曙

曙英宗諱

亭帝謂后曰豈

偶然哉嘉祐八年三月晦日帝起居尚安夜一更遽索藥且召后后至帝指心不能言宣醫投藥已無及帝崩左右欲開宮門召兩府后曰此際宮門不可開但以密敕召兩府黎明入又三令進粥四更再召醫入使人守之望旦兩府入后哭告以上崩令召皇子嗣位英宗初不敢當兩府共抱之解其髮被以黃衣命翰林學士珪懼甚筆不能下丞相魏公韓琦從容曰大行皇帝在位

幾年珪乃能草詔英宗即位數日有疾執政大臣請光獻后垂簾權同聽政后辭退久之乃從則光獻立子之功其可掩哉故神宗深感之所以事光獻之禮甚至迨光獻之崩神宗哀毀不能視朝其所製輓章至今讀之令人流涕也韓魏公薨其子孫倣郭汾陽著家傳十卷具載魏公功業至英宗即位之初乃云光獻信讒屢有不平之語魏公以危言感動曰若官家失照管太后亦未得安穩又言太后曾問漢昌邑王事如何又云太后



言昨夕夢甚異見這孩兒却在慶寧宮

謂英宗復在舊邸

魏公

曰却在慶寧宮乃是聖躬復舊之兆此是好夢又言英

宗不豫魏公奏曰大王長立且與照管

謂神宗

后怒曰尚

欲舊窠中求免耶又言太后對大臣泣訴英宗語曰富

弼意主太后又云太后欲御前殿魏公論奏云云乃止

又云臺諫有章乞早還政太后泣曰若放下更豈見眼

道耶如此等事尚多皆誕妄不恭非所宜言韓氏子孫

販賣松櫟張大勲業以希進用不知陷其父祖於不義

也王巖叟者父子為魏公之客亦著魏公遺事一編其
記魏公言行甚詳至論光獻權同聽政事亦為欺誕謂
太后還政之後魏公勸英宗加儀衛帝曰相公休獎縱
母后又謂魏公對太后曰自家無子不得不認業其意
以為英宗非魏公不得立既立非魏公不得安也英宗
受仁宗天下貴為天子思所以報光獻之德者何以為
稱反惜儀衛末禮有無獎縱母后之語於英宗孝德不
無累乎恭惟太皇太后天下之母也以其無子而令認

業為臣子者悖慢至此不幾於跋扈老子前代姦人自稱定策國老以天子為門生皆繇此以魏公之賢使死者有知其敢當也故神宗嘗曰如此恐非韓琦之意伯溫嘗論英宗之立首建議者范蜀公也繼之者司馬溫公也順成仁宗光獻意者韓魏公也富公辭戶部尚書章呂誨中丞魏公以下遷官疏乃天下之公言也具書之以俟史官採擇

英宗即位之初感疾不能視朝大臣請光獻太后垂簾

權同聽政后辭之不獲乃從英宗才康復后已下手書復辟魏公奏臺諫有章疏請太后早還政后聞之遽起魏公急令儀鸞司撤簾后猶未轉御屏尚見其衣也時富韓公為樞密相怪魏公不關報撤簾事有韓魏公欲致弼於族滅之地之語歐陽公為叅政首議追尊濮安懿王富公曰歐陽公讀書知禮法所以為此舉者忘仁宗累主上欺韓公耳富公因辭執政例遷官疏言甚危三日不報見英宗面奏曰仁宗之立陛下皇太后之功

也陛下未報皇太后大功先錄臣之小勞非仁宗之意也方仁宗之世宗屬與陛下親相等者尚多必以陛下為子者以陛下孝德彰聞也今皇太后謂臣與胡宿吳奎等曰無夫婦人無所告至不忍聞臣實痛之豈仁宗之所望於陛下者哉以笏指御牀曰非陛下有孝德孰可居此英宗俯躬曰不敢富公求去益堅遂出判河陽自此與魏公歐陽公絕後富公致政居洛每歲生日魏公不論遠近必遣使致書幣甚恭富公但答以老病無

書魏公之禮終不替至薨乃已豈魏公有愧於富公者乎
然天下兩賢之魏公歐陽公之薨也富公皆不祭弔國
史著富公以不預策立英宗與魏公至此祭弔不通非
也

本朝自祖宗以儉德垂世故藝祖之訓曰當思在甲馬
營時可也其所用幃簾有青布緣者仁宗生長太平尤
節儉京城南愍賢寺溫成張妃墳院也寺中有溫成宮
中故物素朱漆牀黃絹緣席黃隔織褥帝御飛白書溫

成影帳牌纔二尺朱漆金字而已以溫成寵冠六宮服用止此故帝寢疾大臣入問見所御皆黃紬嗚呼恭儉之德不在此乎英宗內無嬪御王廣淵以濮邸舊僚進待制貧不能辦儀物韓魏公為言帝曰無名以賜不可後數日有旨令廣淵書無逸篇於御屏賜白金百兩嗚呼吾本朝祖宗以節儉為家法如此

光獻太皇太后元豐四年春感疾以文字一函封鐫甚密付神宗曰俟吾死開之唯不可因此罪人帝泣受后

疾愈帝復納此函后曰姑收之是年七月后上仙帝開
函皆仁宗欲立英宗為皇嗣時臣僚異議之書也神宗
執書慟哭以太皇太后遺訓不敢追咎其人故帝宮中
服三年之喪盡禮盡孝者知慈德之不可報也

伯溫侍長老言曰本朝惟真宗咸平景德間為盛時契
丹通和兵革不用家給人足以洛中言之民以車載酒
食聲樂遊於通衢謂之棚車鼓笛仁宗天聖明道初尚
如此至寶元康定間元昊叛西方用兵天下稍多事無

復有此風矣元昊既稱臣帝絕口不言兵慶厯以後天下雖復太平終不若天聖明道之前也嗚呼仁宗之兵應兵也不得已而用之事平不用此所以為仁歟

神宗開穎邸英宗命韓魏公擇宮僚用王陶韓維陳薦孫固孫思恭邵亢皆名儒厚德之士王陶韓維進止有法神宗內朝拜稍急維曰維下拜王當效之諸公一日侍神宗王近侍以弓樣靴進維曰王安用武靴神宗有愧色亟令毀去其翊贊之功如此故穎邸賓僚號天下

選云

神宗初即位中丞王陶言宰相韓魏公不押常朝班為跋扈帝遣近侍以章疏示魏公公奏曰臣非跋扈者陛下遣一小黃門至則可縛臣以去矣帝為之動出王陶知陳州神宗即位銳意求治初用呂溱為翰林學士為開封府溱死又用滕甫為翰林學士為御史中丞甫性疎上時遣小黃門持短封御札問事甫誇示於人或見御札中誤用字者乃反謗甫以為揚上之短上怒疎

斥之以為逆人李逢親黨不復用時王安石居金陵初除母喪英宗屢召不至安石在仁宗時論立英宗為皇子與韓魏公不合故不敢入朝安石雖高科有文學本遠人未為中朝士夫所服乃深交韓呂二家兄弟韓呂朝廷之巨室也天下之士不出於韓即出於呂韓氏兄弟絳字子華與安石同年高科維字持國學術尤高不出仕用大臣薦入館呂氏公著字晦叔最賢亦與安石為同年進士子華持國晦叔爭揚於朝安石之名始盛

安石又結一時名德之士如司馬君實輩皆相善先是治平間神宗為潁王持國翊善每講論經義神宗稱善持國曰非某之說某之友王安石之說至神宗即位乃召安石以至大用

神宗既退司馬溫公一時正人皆引去獨用王荊公盡變更祖宗法度用兵言利天下始紛然矣帝一日侍太后同祁王至太皇太后宮時宗祀前數日太皇太后曰天氣晴和行禮日亦如此大慶也帝曰然太皇太后曰

吾昔聞民間疾苦必以告仁宗嘗因赦行之今亦當爾
帝曰今無它事太皇太后曰吾聞民間甚苦青苗助役
錢宜因赦罷之帝不懌曰以利民非苦之也太皇太后
曰王安石誠有才學然怨之者甚衆帝欲愛惜保全不
若暫出之於外歲餘復召用可也帝曰羣臣中惟安石
能橫身為國家當事耳祁王曰太皇太后之言至言也
陛下不可不思帝因發怒曰是我敗壞天下耶汝自為
之祁王泣曰何至是也皆不樂而罷溫公嘗私記富韓

公之語如此而世無知者崇寧中蔡京等修哲宗史以
王安石為聖人然亦書慈聖光獻后宣仁聖烈后因間
見上流涕為言安石變亂天下已而安石罷相豈安石
之罪雖其黨竟不能文耶抑天欲彰吾本朝母后之賢
自不得而刪也帝退安石十年不用元豐末帝屬疾念
可以託聖子者獨曰將以司馬光呂公著為師傅王安
石不預也嗚呼聖矣哉神宗元豐四年召北京留守文
潞公陪祀南郊會更官制自司徒侍中拜太尉罷侍中

為開府儀同三司判河南府陞辭先是故叅知政事王堯臣之子國老以至和中潞公與劉沆富韓公王叅政堯臣共乞立英宗為皇嗣章草進明其父功帝留之禁中面問潞公公對與國老合乃加潞公兩鎮節度使官其子宗道為承事郎潞公力辭兩鎮止受食邑劉沆贈太師中書令兗國公子僅自祠部員外郎為天章閣待制王堯臣贈太師中書令諡文忠子國老自水部員外郎充祕閣校理富公進司徒子紹京除閣門祗候富公

之客李僊問公曰公治平初進戶部尚書屢辭今進司徒一辭而拜何也公曰治平初乃某自辭官今日潞公以下皆遷某豈敢堅辭妨他人也蓋潞公與荆公論政事不合出判北京七年不召自此帝眷禮復厚矣

神宗初欲破夏國遂親征大遼御營兵甲器械旗幟皆備分河北諸路兵遂將置保甲民兵諸路騷動一日帝衣黃金甲以見光獻太后后曰官家着此天下人如何脫去不祥又欲京城安樓櫓后亦不許但以庫貯於諸

門

神宗友愛二弟不聽出於外至元祐初宣仁太后始命
築宅於天波門外既就館哲宗奉宣仁后臨幸有旨二
王諸子各進官一等舍人蘇軾行制辭曰先皇帝篤兄
弟之好以恩勝義不許二叔出居於外蓋武王待周召
之意太皇太后嚴朝廷之禮以義制恩始從其請出就
外宅得孔子遠其子之義二聖不同同歸於道可以為
萬世法朕奉侍兩宮按行新第顧瞻懷思潜然出涕昔

漢明帝問東平王在家何等為樂王言為善最樂帝大
其言因送列侯印十九枚諸子年十五以上悉帶之著
之簡冊天下不以為私今王諸子性于忠愛漸於禮義
自勝衣以上頎然皆有成人之風朕甚嘉之其各進一
官以助其為善之樂尚勉之哉母忝父祖以為邦家之
光次日丞相呂大防范純仁二夫人入見宣仁后曰昨
同皇帝幸二王府二王侍立尚食甚恭皇帝待之亦盡
禮吾老矣深以此為喜又曰仁宗事燕王盡子姪禮王

頗自重但以行第呼仁宗雖禁中服用王輒取之仁宗不敢吝吾二兒豈敢如此嗚呼后之言其旨深矣不幸后上仙小人謗毀靡所不至天下寃之其詳伯溫著之辨誣云

聞見錄卷三

欽定四庫全書

聞見錄卷四

宋 邵伯溫 撰

熙寧七年春契丹遣汎使蕭禧來言代北對境有侵地
請遣使分畫神宗許之而難其人執政議遣太常少卿
判三司開拆司劉公忱為使忱對便殿曰臣受命以來
在樞府考核文據未見本朝有尺寸侵敵地且鴈門者
古名限塞雖跬步不可棄奈何欲委五百里之疆以資
敵乎臣既辱使指當以死拒之惟陛下主臣之言幸甚

帝遣之忱出疆帝手敕曰寇理屈則忿卿姑如所欲與之忱不奉詔初以祕書丞呂公大忠為副使命下大忠丁家艱詔起復未行公亦使回敵又遣蕭禧來帝開天章閣召執政與忱大忠同對資政殿論難之久帝曰凡敵爭一事尚不肯已今兩遣使豈有中輟之理卿等為朝廷固惜疆境誠是也然何以弭患大忠進曰彼遣使相來即與代北之地若有一使曰魏王英弼者來求關南之地則如何帝曰卿是何言也大忠曰陛下既以臣

言為不然今代北安可啓其漸忱進曰大忠之言社稷
大計願陛下熟思之執政皆知不可奪罷忱為三司鹽
鐵判官大忠乞終喪制帝遣中使賜富韓公韓魏公文
潞公曾魯公手詔其略曰朝廷通好契丹幾八十年近
歲以來生事彌甚代北之地素無定封故造釁端妄求
理辨比敕官吏同加案行雖圖籍甚明而詭辭不服又
橫使復至意在必得敵情無厭勢恐未已萬一不測何
以待之古之大政必詔故老云云韓魏公疏曰臣觀近

年以來朝廷舉事則似不以大敵為恤敵人見形生疑必謂我有圖復燕南之意雖聞北主孱而妄弱豈無強梁宗屬與夫謀臣策士引先發制人之說造此釁端故屢遣使以爭理地界為名觀我應之之實如何爾其所致彼之疑者七事高麗臣屬契丹於朝廷久絕朝貢乃因商舶招諭而來且高麗來與不來於國家固無損益而契丹知之謂朝廷將以圖我一也吐蕃部族不相君長未嘗為邊患而強取其地逮熙河一路殺其老弱以

數萬計所費不貲契丹聞之當謂行將及我二也邊近
西山地勢高仰不可為溘濬向聞遣使部兵徧植榆柳
冀其成長以制敵騎昔慶厯慢書所謂創立隄防障塞
要路無以異矣三也義勇民兵將校甚整教習亦精而
忽創團保甲一道紛然義勇人十去其七破可用之成
法得增數之虛名四也河北諸州緣邊近裏城池工築
並興增置防城之具檢視衣甲器械五也創都作院頒
降弓刀新樣大作戰車此皆衆目所覩諜者易窺費財

殫力先自困弊六也置河北三十七將各專軍政州縣不得關預聲言出征又深見可疑之形七也夫契丹素為敵國因事起疑不得不然亦其善自為謀者也今橫使再至初示偃蹇以探伺朝廷况代北初與雄州素有定界若優容而與之敵情無厭浸淫無已不許敵遂持此以為已直縱未大舉勢必漸擾諸邊卒隳盟好臣昔曾言青苗錢事而言者輒肆厚誣非陛下之明幾及大戮自此聞新法日下實避嫌疑不敢論列今親被詔問

事係國家安危言及而隱罪不容誅臣嘗竊計始為陛下謀者必曰自祖宗以來因循苟簡治國之本當先富強聚財積穀寓兵于民則可以鞭笞四夷盡復唐之故疆然後制禮作樂以文太平故散青苗錢使民出利又為免役之法次第取錢雖百端補救終求善法此所謂富國之術也又內外置市易務小商細民無措手足加以新制日下更改無嘗官吏茫然不能詳記違者坐徒不以赦降監司督責以刻為明簿法之苛過於告緡今

農怨於畝畝商旅歎於道路官吏不安其職恐陛下不盡知也夫欲攘斥四夷以興太平而先使邦本困搖衆心離怨此則陛下始謀者大誤也陛下有堯之仁舜之聰改過不吝聖人之德也而又好進之人不顧國家利害但得邊事將作富貴可圖必曰敵勢已衰特外示驕慢爾以陛下神聖文武若擇將臣領大兵深入邊境則強劃之地一舉可復此又未之思也今河朔累歲災傷民力大乏緣邊次邊州郡芻糧不充新選將官皆麁勇

寡謀之人義勇保甲新點未經訓練若驅重兵頓於堅城之下糧道不繼腹背受敵雖曹彬米信名德宿將猶以此致歧溝之敗也臣愚今為陛下計謂宜遣使報聘優致禮幣具言朝廷向來興作乃脩備之常與北朝通好之久自古所無豈有它意恐為諜者所誤耳且疆土素定當如舊界請命邊吏退近者侵占之地不可持此造端隳累世之好永敦信誓兩絕嫌疑望陛下以自見可疑之形如將官之類因而罷去以釋其疑則可以遷

延歲月陛下益養民愛力用賢任能疎遠姦諛進用忠鯁天下悅服邊備日充塞下有餘蓄帑中有羨財若果自敗盟誓有衰亂之形然後一振威武恢復故疆快忠義不平之心雪祖宗累朝之憤矣富韓公疏曰臣五六年來切聞綏州囉瓦熙河辰錦戎瀘交趾咸議用兵或以喪師或以獻馘即時傳播四方而西師初舉便傳必復靈夏既又大傳有人上平燕之策契丹必然尋以探知彼復聞朝廷練士馬繕城池利器械聚芻糧加之招

致高麗欲為牽制又置河北三十六將事機叅合此北
人所以先期造釁既發爭端勢未肯已也今釁已成代
北各屯兵馬境上爭論逾年未決橫使再至事歸朝廷
自當之則恐理難款緩便要可否違之則兵起而患速
順之則河東斥堠日蹙雖款目前遺患在後臣謂不若
一委邊臣堅持久來圖籍疆界為據使之盡力交相詰
難然契丹非不自知理曲蓋欲生事遂興干戈豈是無
故驟興實有以致其來也惟陛下深省熟慮不可獨謂

北人造釁背盟也惟彼若萬一入寇事不得已我但嚴兵以待之來則禦戰去則備守此自古中興防邊之要也若朝廷乘忿便欲深入討擊臣實慮萬有一跌其害非細或更與西夏為犄角之勢則朝廷宵旰事既至此二邊警急數年未得息肩四方凶徒必有觀望者臣願陛下以宗社為憂以生靈為念納汙含垢且求安靜非萬全不舉此天下之願而臣之志也而又喧傳陛下決為親征之謀中外聞之心殞膽落陛下英睿天縱必

有成算然太平天子與創業之主事體絕異尤不可慨然輕舉又恐朝廷且作聲勢初無實事若如此乃是我以虛聲而召彼實來也張虛聲者必有疎略之虞作實來者必盡周密之慮成敗豈不灼然假令敵人能得志而還此契丹一種事力素強又有夏國唃廝囉高麗黑水女真韃靼諸蕃為之黨援其勢必難殄滅則繇此結成邊患卒無已時臣竊謂因今橫使之來且可選人以其疑我者數事開懷諭之云凡為武備乃中國常事非


欲外興征伐向來用武之地皆小蕃有過者朝廷須當
問罪若吾二大邦通好已七十餘年無故安肯輒欲破
壞又恐是姦人走作妄興鬪謀因此互相疑貳養成釁
隙遂有今日爭理如朝廷更有可說之事但盡說之須
令釋然無惑乃一助也橫使如不的即遣報聘者於戎
主前且道此意庶幾一得必有所益緣彼大藉朝廷歲
與方成國計既有憑藉之心豈無安靜之欲只以疑情
未釋遂成倔强若與開解明白必肯回心若兩情不通

禍患日深必成後悔臣更望陛下兼採博訪不宜專聽
一偏恐有迎合聖意及畏避用事之人不敢以實事聞
而誤國家大計臣所以及此者竊聞去春久旱陛下時
降手詔許人極陳時政得失尋聞上章論列者甚多隨
而或遭貶降陛下殊不以手詔召人極陳為意而優容
之及令得罪士大夫自此皆務結舌下情不能上達朝
政莫大患也願陛下深思極慮早令天下受賜也文潞
公曾魯公疏皆主不與之論皆乞選將帥利兵甲以待

敵時王荊公再入相曰將欲取之必姑與之也以筆畫其地圖命天章閣待制韓公縝奉使舉與之蓋東西棄地七百餘里云韓公承荊公風旨視劉公呂公有愧也議者為朝廷惜之嗚呼祖宗故地孰敢以尺寸不入王會圖哉荊公輕以畀鄰國又建以與為取之論使帝竟置韓富二公之言不用至後世姦臣以伐燕為神宗遺意卒致天下之亂荊公之罪可勝數哉

神宗天資節儉因得老宮人言祖宗時妃嬪公主月俸

至微歎其不可及王安石獨曰陛下果能理財雖以天下自奉可也帝始有意主青苗助役之法矣安石之術類如此故呂誨中丞彈章曰外示朴野中懷狡詐



聞見錄卷四

欽定四庫全書

子部

聞見錄卷五至七

詳校官監察御史臣邱文愷

侍讀臣孫球覆勘

總校官進士臣繆琪

校對官中書臣王家賓

謄錄監生臣楊景猷

欽定四庫全書

聞見錄卷五

宋 邵伯溫 撰

紹聖初哲宗親政用李清臣為中書侍郎范丞相純仁與清臣論事不合范公求去帝不許范公堅辭帝不得已除觀文殿大學士除穎昌府召章惇為相未至清臣獨當中書益覲幸相位復行免役青苗法除諸路常平使者惇至不能容以事中之清臣出知北京建中靖國初上皇即位用韓忠彥為相清臣為門下侍郎忠彥與

清臣有連故忠彥惟清臣言是聽清臣復用事范右丞
純禮忠彥所薦清臣罷之劉安世呂希純皆忠彥所重
清臣不使入朝外除安世帥定武希純帥高陽張舜民
忠彥薦為諫大夫清臣出之帥真定其所出與外除及
不使入朝者皆賢士清臣素所憚不可得而用者忠彥
懦甚不能為主曾布為右相范致虛諫疏云河北三
帥連衡恐非社稷之福劉安世呂希純同日報罷清臣
亦為布所陷出知北京伯溫嘗論紹聖建中靖國之初

朝廷邪正治亂未定之際皆為一李清臣以私意幸相位壞之邪說既勝衆小人並進清臣自亦不能立於朝矣使清臣在紹聖初同范丞相在建中靖國初同范右丞劉安世呂希純張舜民以公議正論共濟國事則朝廷無後日之禍而清臣亦得相位矣此忠臣義士惜一時治亂之機為之流涕者也

元符末上皇即位皇太后垂簾同聽政有旨復哲宗元祐皇后孟氏位號自瑤華宮入居禁中時有論其不可

者曰上於元祐后叔嫂也叔無復嫂之理程伊川先生謂伯溫曰元祐皇后之言固也論者之言亦未為無理伯溫曰不然禮曰子甚宜其妻父母不說出子不宜其妻父母曰是善事我子行夫婦之禮焉皇太后於哲宗母也於元祐后姑也母之命姑之命何為不可非上以叔復嫂也伊川喜曰子之言得之矣相繼姦臣曾布蔡京用事朋黨之禍再作元祐后竟出居舊宮者二十年靖康初大金陷京師逼上皇淵聖帝北狩宗族盡徙獨

元祐后以在道宮不預冠退羣臣請入禁中垂簾聽政以安反側至上即位於宋幸維揚寇再犯幸餘杭后於艱難中輔成上聖德為多后崩上哀悼甚不能視朝者累日下詔服齊衰謚曰昭慈聖獻嗚呼后逮事宣仁聖烈太后其賢有自矣至於廢興則天也

熙寧初韓魏公罷政富公再相神宗首問邊事公曰陛下即位之初當布德行惠願二十年不言用兵二字蓋是時王荊公已有寵勸帝用兵以威四夷初是用王韶

取熙河以斷西夏右臂又欲取靈武以斷大遼右臂又結高麗欲圖大遼又用章惇為察訪使以取湖北夔峽之蠻又用劉彝知桂州沈起為廣西路安撫使以窺交趾二人不密造戰艦於富良江上交趾偵知先浮海載兵陷廉州又破邕州殺守臣蘇緘屠其城掠生口而去又用郭逵趙卨宣撫廣南使直搗交趾逵老將與卨議論不同為交趾扼富良江兵不得進瘴死者十餘萬元豐四年五路大進兵取靈武夏人決黃河水櫃以灌

吾壘兵將凍溺餓饑不戰而死者數十萬人又用呂惠卿所薦徐禧築永樂城夏人以大兵破之自禧而下死者十餘萬人報夜至帝早朝當宁慟哭宰執不敢仰視帝歎息曰永樂之舉無一人言其不可者右丞蒲宗孟進曰臣嘗言之帝正色曰卿何嘗有言在內惟呂公著在外惟趙高曾言用兵不是好事既又謂宰執曰自今更不用兵與卿等共享太平然帝從此鬱鬱不樂以至大漸嗚呼痛哉

元符末哲宗升遐上皇即位欽聖皇太后垂簾同聽政
召范忠宣公於永州虛宰席以待忠宣病不能朝乃拜
韓忠彥為左僕射安燾有時望方服母喪乃拜曾布為
右僕射次年改建中靖國欽聖太后上仙布為山陵使
布與內臣劉瑗交通多知禁中事就陵下密諭中丞趙
挺之建議紹述以迎合上意布還朝與忠彥勢相敵漸
逐忠彥薦引之士右丞范公純禮為人沈默剛正數以
言忤上布憚之謂駙馬都尉王誨曰上欲除君樞密都

承旨范右丞不以為然遂罷蓋詵嘗以劄子求此官於上上稟皇太后后曰王詵浮薄果使為之則壞樞密院駙馬都尉王師約在先朝為此官稱職可命之上從王詵所納劄子批除王師約樞密都承旨皇太后之意也布妄言出於范右丞以激怒詵詵信而恨之後詵因館伴大遼使妄稱范右丞押宴席間語犯御名辱國右丞不復辨以端明殿學士出知潁昌府自此忠彥之客相繼被逐矣布專意紹述盡復紹聖元符之政忠彥懦而

無智既怨布乃曰布之自為計者紹述耳吾當用能紹述者勝之遂召蔡京京之用自韓忠彥始忠彥竟不能安其位罷去布獨相臺諫官陳瓘龔夬輩多賢者皆布所用亦不合去蔡京拜右丞至作相蔡卞知樞密院京既用事曾布罷相京師起大獄治布賊狀貶布白州司戶叅軍廉州安置布之諸子及門下士皆重責蔡京為之也韓忠彥亦安置於河北近郡尋聽自便京陰報其薦引之功云大觀末上頗厭京因星變出之又以飾臨

平之山決興化之水等事謂其有不利社稷之心貶太子少傅居蘇州上用張商英為右相商英無術寡謀藐視同列間言並興上不樂罷之京密結內臣童貫因貫使大遼歸詐言遼主問蔡京何在上信之再召京時何執中已為左相乃拜京太師謂之公相總三省事童貫既引京自欲為樞密使京止以為太尉節度使陝西宣撫使貫大失望始怨京矣京以太師致仕上命鄭居中為相居中丁母憂去余深皆鄙夫小人無足言又相王

黼黼年少凶愎欲其功高蔡京乃獨任結大金滅大遼
取燕雲事置經撫房樞密院皆不預下族誅之令禁言
北事黼後以太傳致仕猶領應奉司以固上寵白時中
李邦彥並左右相儼薄庸懦無所立蔡京以盲廢復出
領三省事用其子條為謀主條與其兄相仇條敗京復
致仕宣和七年十一月上郊天罷方恭謝景靈宮聞金
人舉兵犯京師上下詔稱上皇禪位於淵聖皇帝改元
靖康李邦彥主和議遣李鄴李稅鄭望之使金割三鎮

為城下之盟兵退李邦彥罷復不許三鎮次年冬金破
京師二帝北狩今上即位於宋幸維揚渡江幸餘杭嗚
呼曾布蔡京王黼之罪上通於天也具載之以為世戒

聞見錄卷五

欽定四庫全書

聞見錄卷六

宋 邵伯溫 撰

伯溫崇寧中居洛因過仁王僧舍得葉子冊故書一編
有趙普中書令雍熙三年為鄧州節度使日諫太宗皇
帝伐燕疏與劄子各一道其憂國愛君之深言出乎文
章之外者雖雜陸宣公論事中不辨也疏曰武勝軍節
度使臣趙普右臣自二月中伏覩忽降使臣差船糧草
及詳教命知取幽州既奉指揮尋行科配非時舉動莫

測因繇爾後雖聽捷音未聞成事稍稽尅復俄及炎蒸
飛芻輓粟以猶繁擐甲持戈而未已民疲師老漸恐有
之臣自此月以來轉增疑慮潛思陛下萬幾在念百姓
為心聖略神功舉無遺算至於平收浙右力取河東垂
後代之英奇雪前朝之憤氣四海咸歸於掌握十年時
致於雍熙唯彼蕃戎豈為敵對遷徙鳥舉自古難得制
之前代聖帝明王無不置於化外任其追逐水草皆以
不治治之此際官家何須掛意必是有人扶同諂佞誑

惑聰明因舉不急之兵稍涉無名之議非論曲直但覺淹延將成六月之征頗有千金之費以茲忖度深抱憂虞竊念臣雖寡智謀粗親墳典千古興亡之理得自簡編百王善惡之徵聞於經史其間禍淫福善莫不如影隨形煥若丹青明如日月嘗為大訓歷代寶之臣讀史記見漢武帝時主父偃徐樂嚴安輩所上書及唐玄宗時宰相姚元崇直奏十事可以坐銷患害立致昇平惟慮至尊未能留意醫時救弊無出於斯又聞前事為

後事之師古人是今人之則據其年代雖即不同量彼
是非必然無異輒思抄錄專具進呈伏望聖慈特垂披
覽謹具逐件如後云云伏念臣謬以庸材叨居顯位幸
遇千年之運深承二聖之知從白屋而上青霄非繇智
略出卑僚而登極位只是遭逢恩私何啻於車魚報效
不如於犬馬粗懷性識嘗積驚惶所恨者齒髮衰殘精
神減耗既不能獻謀闕下又不能效命軍前惟有微誠
書章上奏今者伏自朝廷大興禁旅遠伐山戎驅百萬

戶之生靈咸當輦運致數十州之地土半失耕桑則何異為鼯鼠而發機將明珠而彈雀所得者少所失者多只於得少之中尤難入手更向失多之外別有關心前未見於便宜可垂興於詳酌臣又聞聖人不凝滯於物見可而進知難而退理有變通情無拘執故前所謂事久則慮易兵久則變生臣之愚誠深懼於此秦始皇之拒諫終累子孫漢武帝之回心轉延宗社如忽遲晚恐失機宜而况旬朔之間便為一月竊慮內地先因邊廷

荒涼北敵則弓硬馬肥轉難擒制中國則民疲師老應
誤指呼臣今獨興沮衆之言深負彌天之過輒陳狂瞽
抑有其繇竊以暮景殘光能餘幾日酬恩報義正在今
時恐勞宵旰之憂寧避僭踰之罪虔希聖德早議抽軍
聊為一縱之謀別有萬全之策伏望皇帝陛下安和寢
饒惠養疲羸長令戶外不扃永使邊烽罷警自然殊方
慕化率土歸仁既四夷以來王料契丹而安往又何必
勞民動衆賣犢買刀有道之事易行無為之功最大如

斯弔伐是又萬全臣又竊料陛下非次興兵恐因偏聽其奈人多獻佞事久陽微大凡小輩各務身謀誰思國計或承宣問皆不實言盡解欺君嘗憂敗事得之則奸邪獲利失之則社稷懷憂昨者直取幽州未審誰為謀者必無成算俱是誑言其於虛實之間此際總應彰露臣既不知頭主無以指射姓名伏望官家尋其尤者特正姦人之罪免傷聖主之明所貴詐偽悛心忠臣盡力共畏三千之法同堅八百之基臣於此時欲吐肺肝先

寒毛髮驚疑猶豫數日沉思又念往昔臨終尚能屍諫
微臣未死爭忍面諛明知逆耳之言不是全身之計但
緣恩同卵翼命直鴻毛將酬國士之知豈比衆人之報
投荒棄市甘當此日之誅竊祿偷安不造來生之業惟
祈聖明特賜察量更存細微別具劄子冒犯冕旒臣無
任傾心瀝懇憂國忘家涕泗徬徨激切屏營之至其劄
子曰臣濫守藩方聊知稼穡竊見當州管界承前多是
荒涼戶小民貧程遙路僻量其境土五縣中四縣居山

驗彼人家三分內二分是客昨來差配甚覺艱辛伏緣
在此直至莫州來往四千餘里或是無丁有稅須至雇
人般量每斛雇召之資賤者不下五百元配二萬石數
約破十萬貫錢直如本戶自行費用無多所較乃是二
萬家之貧戶出此十萬貫之見錢所以典業費牛十間
六七其間兼有鬻男女者亦有弃性命者仍如善誘偶
副嚴期自從起發去來已及八十餘日近知內有人戶
衷私却到鄉村皆云裝起軍糧未有送納去處緣無口

食再取盤纏雖不辨其真虛又難行於本覆訪聞街坊竊議前後說得多般稱被契丹圍却軍都兼被劫糧草及令尋勘皆却隱藏蓋緣臣無以知軍前事宜只聽得外面消息况九重密事應不泄於朝廷奈何百姓流言已相傳於道路詳其住滯必有艱難伏乞聖慈平令停罷更或遲久轉費糧儲潛思今日人情不可再行差配如或再行徭役決定廣有逃移假令收下幽州邊境轉廣干戈未息忽然生事未見理長必因有僭濫之徒姦

邪之黨但說契丹時逢幼主地有災星以此為詞曲中
聖旨不審戎情上下幽州俱致其生涯土宿照臨外處
不可以征討若彼能同衆意縱幼主以難輕不順羣情
無災星而亦敗誠宜守道事費無私如樂禍以求功竊
慮得之而不武此蓋兩省少昌言之士靈臺無有藝之
人而况補闕拾遺合專司於規諫天文歷算須預定於
吉凶成茲誤失之繇各負疎遺之罪若無愆責何戒後
來一臣緣久居近職備見人情至於後殿三班前朝百

辟文武雖異是非略同纔奉委差便思僥倖雖詢利害各避嫌疑而况毀譽生心貪求恣意扶同狂妄率以為常其間久歷事者明知而佯作不知初為官者不會而仍兼詐會多非允當少得純良而又凡關宣敕委差便是帝王心腹方資視聽切要精詳就中同軍不同閒事必料曹使沿邊相度往返叅詳不知能有幾人應得當時言語如今比較並見直虛乞誅罔上之輩流便作抽軍之題目自此則潛消媚佞免誤朝廷唯此區分以為

激勸一唯有勾抽不同舉發一則我無關志一則彼有
讎心而况契丹懷吞并之心恃戎馬之力垂慈恕捨却
慮追奔須作隄防免輸奸便伏乞皇帝陛下密授成算
遐宣睿謀但令硬弩長槍周施禦捍前歌後舞小作程
途縱逼交鋒何憂乏力只應信宿尋達城池便可使戰
士解鞍且作防邊之旅耕夫歸舍重為樂業之人是知
多難興王已垂芳於往昔從諫則聖宜頌美於當今此
事既行天下幸甚一臣今將本末細具敷陳嘗思發跡

之繇實有殊常之幸其於際遇近代無倫伏自宣宗皇帝滁州不安之時臣蒙召入臥內昭憲太后在宅寢疾之日陛下喚至牀前念以傾心皆曾執手溫存撫諭不異家人惟懷竭節盡忠以至變家為國慙虧德望有此遭逢先皇開創之初尋居密地陛下纂承之後再入中書蒙二聖之深知當兩朝之大用不惟此世應繫前生禮雖限於君臣恩實同於骨肉是以凡開啓沃罔避危亡蓋緣每認陛下本是天人暫來人世是以生知福業

性稟仁慈潛聞內裏看經盤中戒肉今者願忍一朝之
忿嘗隆萬劫之因如或未止干戈必恐漸多殺害即因
民愁未定戰勢方搖仍於夢幻之中大作煩勞之事是
何微類誤我至尊乞明驗於奸人願不容於首惡興言
及此涕淚交流又念臣雖寡智謀實同榮辱都緣意切
不覺辭煩冒犯宸嚴不勝戰越其疏與國史所載大略
相似有不同者劄子則惟見於此太宗晚喜佛中令因
其所喜以諫云

伯溫竊聞太祖一日以幽燕地圖示中令問所取幽燕之策中令曰圖必出曹翰帝曰然又曰翰可取否中令曰翰可取孰可守帝曰以翰守之中令曰翰死孰可代帝不語久之曰卿可謂遠慮矣帝自此絕口不言伐燕至太宗因平河東乘勝欲搗燕薊時中令鎮鄧州故有是奏帝下詔褒其言嗚呼中令從祖宗定天下尚以取幽燕為難近時小人竊大臣之位者乃建結女真滅大遼取幽薊之議卒致天下之亂悲夫

王晉公祐事太祖為知制誥太祖遣使魏州以便宜付之告之曰使還與卿王溥官職時溥為相也蓋魏州節度使符彥卿太宗夫人之父有飛語聞於上祐往別太宗於晉邸太宗卻左右欲與之言祐徑趨出祐至魏得彥卿家僮二人挾勢恣橫以便宜決配而已及還朝太祖問曰汝敢保符彥卿無異意乎祐曰臣與符彥卿家各百口願以臣之家保符彥卿家又曰五代之君多因猜忌殺無辜故事國不長願陛下以為戒帝怒其語直

貶護國軍行軍司馬葉州安置七年不召太宗即位謂
輔臣曰王祐文章之外別有清節朕所自知以兵部侍
郎召不及見而薨初祐笑曰某不做兒子二郎必做二
郎者文正公旦也祐素知其必貴手植三槐於庭曰吾
子孫必有為三公者已而果然天下謂之三槐王氏
國初趙普中令為相於廳事坐屏後置二大甕凡有人
投利害文字皆置中滿即挺於通衢李沆文靖為相當
太平之際凡建議務更張喜激昂者一切不用曰以報

國耳嗚呼賢相思慮遠矣至熙寧初王荊公為相寢食不暇置條例司潛論天下利害賢不肯雜用賢者不合而去不肯者嗜利獨留盡變更祖宗法度天下紛然以致今日之亂益知趙中令李文靖得為相之體也

太宗一日謂宰輔曰朕如何唐太宗衆人皆曰陛下堯舜也何太宗可比丞相文正公李昉獨無言徐誦白樂天詩云怨女三千放出宮死囚八百來歸獄太宗曰朕不如也神宗序溫公資治通鑑曰若唐之太宗孔子所

謂禹吾無間焉者神宗可謂無愧於太宗矣至召見王
荊公首建每事堯舜之論神宗信之荊公與其黨始務
為高大之說至厭薄祖宗以為不足法况唐之太宗乎
文正公之言可拜也

真宗不豫大漸之夕李文定公與宰執以祈禳宿內殿
時仁宗幼冲八大王元儼者有威名以問疾留禁中累
日不肯出執政患之無以為計偶翰林司以金盃貯熟
水曰王所須也文定取案上墨筆攪水中水盡黑令持

去王見之大驚意其有毒也即上馬去文定臨事大率類此

太祖既下江南以賈黃中知金陵一日黃中按行府第見庫舍扃鐫甚嚴集僚吏發之得寶貨數十巨櫝皆李氏宮闈之物不隸於籍者黃中悉表上之太祖歎曰吾府庫之物有籍貪黷者尚冒禁盜之况此亡國之遺物乎贈黃中錢三百萬以旌其潔黃中唐相耽四世孫也年七歲以童子舉及第李文公昉贈之詩曰七歲神童

古所難賈家門戶有衣冠十人科第排頭上五部經書
誦舌端見榜不知名字貴登筵未識管絃歡從今穩上
青雲去萬里誰能測羽翰至太平興國中遂叅大政年
五十六以卒太宗厚恤其家謂其母曰勿以諸孫及私
門之窘自撓朕嘗記之也黃中之孫種民者元豐中為
宰相蔡確所用官大理寺丞鍛鍊故相陳恭公執中之
子世孺與其婦獄至極典天下寃之又以蔡確風旨就
府第問同知樞密院呂公公著呼公之子希純及老嫗

立庭下問世孺妻呂氏請求事以枷掛脅之希純等曰
呂氏因樞密之姪嘗以此事來告樞密樞密不語垂涕
而已竟無以為罪神宗知之怒曰元無旨就問呂公著
賈種民小臣輒敢凌辱執政特衝替黃中之後衰矣

賈黃中字媧民滄州人唐相耽之裔所贈詩或云竇
儀年十五舉進士授校書郎集賢校理左拾遺補闕
嶺南平為采訪使江南平知昇州召還知制誥遷翰
林學士太宗多召見訪以時政得失對曰職當書詔

思不出位太宗益重之除給事中叅知政事太宗召見其母王氏命之坐謂曰教子如是今之孟母也性端重守家法多知臺閣故事朝之典禮資以損益當時名士皆出其門有文集行於世三十卷公與宋白李至呂蒙正蘇易簡五人同拜翰林學士時承旨扈蒙贈詩曰五鳳齊飛入翰林其後皆為名臣

聞見錄卷六

欽定四庫全書

聞見錄卷七

宋 邵伯溫 撰

范魯公質舉進士和凝為主文愛其文賦凝自以第十三登第謂魯公曰君之文宜冠多士屈居第十三者欲君傳老夫衣鉢耳魯公以為榮至先後為相有獻詩者云從此廟堂添故事登庸衣鉢亦相傳周祖自鄴舉兵向闕京師亂魯公隱於民間一日坐封丘巷茶肆中有入貌怪陋前揖曰相公無慮時暑中公所執扇偶書大

暑去酷吏清風來故人詩二句其人曰世之酷吏冤獄
何止如大暑也公他日當深究此弊因携其扇去公惘
然久之後至祆廟後門見一土偶短鬼其貌肖茶肆中
見者扇亦在其手中公心異焉亂定周祖物色得公遂
至大用公見周祖首建議律條繁廣輕重無據吏得以
因緣為姦周祖特詔詳定是為刑統

范魯公戒子孫詩其略曰戒爾學立身莫若先孝悌怡
怡奉親長不敢生驕易戰戰復兢兢造次必於是戒爾

學干祿莫若勤道藝嘗聞諸格言學而優則仕不患人不知惟患學不至戒爾遠恥辱恭則近乎禮自卑而尊人先彼而後已相鼠與茅鴟宜鑒詩人刺戒爾勿曠放曠放非端士周孔垂名教齊梁尚清議南朝稱八達千載穢青史戒爾勿嗜酒狂藥非佳味能移謹厚性化為凶險類古今傾敗者歷歷皆可記戒爾勿多言多言衆所忌苟不慎樞機災戾從此始是非毀譽間適足為身累舉世重交游擬結金蘭契忿怨從是生風波當時起

所以君子性汪汪如水舉世好奉承昂昂增意氣不
知奉承者以爾為玩戲所以古人疾籛條與戚施舉世
重任俠俗呼為氣義為人赴急難往往陷刑制所以馬
援書勤勤告諸子舉世賤清素奉身好華侈肥馬衣輕
裘揚揚過閭里雖得市童憐還為識者鄙恭惟祖宗所
用宰輔皆忠厚篤實之士獨魯公為之稱首余讀國史
得其詩錄以為子孫之戒

僧海妙者謂余言昔出入丁晉公門下公作相時鑿池

養魚覆以板每客至去板釣鮮魚斫膾其餽饌珍異不可勝數後自朱崖以秘書少監移光州海妙往見之公野服杖屨行山中觀村民採茶勞其辛苦人不知為晉公也公與海妙相別曰吾不死五年趙元昊叛邊事起朝廷更用大臣公無疾沐浴衣冠臥佛堂中而薨

元豐二年予居洛有老父年八九十自云少日隨丁晉公至朱崖頗能道當時事問之老人曰公自分司西京貶崖州某從行至龍門南彭婆鎮公病瘡夜遇盜失物

甚多至今有玉梳在潁陽富家盜所質也至崖州久之
某辭歸公授以蠟丸戒曰後西京知府與會府官即投
之某如所教知府王欽若也對府官得之不敢開遽以
奏乃自陳乞歸表也其中云雖滔天之罪大而立主之
功高繼有旨復祕書監移光州嗟夫任智數者君子所
不為也世謂丁晉公王冀公皆任智數如老人之言則
晉公又出冀公之上矣

王內翰禹偁字元之濟州鉅野人世農家九歲為歌詩

畢士安作州從事亟稱之長益能文有場屋聲登太平
興國八年進士第召試相府擢右拾遺直史館因北敵
犯邊獻書建和議太宗賞之宰相趙普尤加器重至景
德間卒用其議與北通好又與夏侯嘉正羅處約杜鎬
同校三史多所是正進左司諫知制誥因論徐鉉為人
誣告內翰辨其非罪責商州團練副使尋召入翰林為
學士孝章皇后上仙詔遷梓宮於故燕國長公主第羣
臣不為服內翰言后嘗母儀天下當遵用舊禮罪以謗

謫知滁州真宗即位以直言應詔召為知制誥咸平初修太祖實錄與宰相論不合又以謗謫知黃州移蘄州死於官其平生大節如此故所著建隆遺事一曰篋中記自敘甚秘蓋曰吾太祖皇帝諸生也一代之事皆目所見者考於國史或有不同一曰上性嚴重少言酷好看書雖在軍中手不釋卷若聞人間有奇書不吝千金以求之顯德初從世宗南征初平淮甸有織人譖於上世宗曰趙某自下壽州私有重車數乘世宗遣人伺察

之果有籠篋數車遽令別入行在面開之無他物惟書數千卷世宗異之召上諭之曰卿方為朕作將帥辟土疆當堅甲利兵何用書為上頓首謝曰臣無奇謀上贊聖德濫膺委任嘗恐不迨所以聚言觀覽欲廣見聞增智慮也世宗曰善史曰上北征之夕次陳橋驛羅彥環等獻中央之服立上為天子請登馬南歸才出驛門上勒馬不前謂諸將校曰我有號令能稟之乎諸將皆伏地聽命上曰爾輩自貪爵賞逼我為君今入京師不得

輒恣劫掠依吾令即當有重賞不然則連羣撥隊有斧鉞之誅諸將皆再稟命戎馬遂行既入國門兵至如賓秋毫不犯先是京城居人聞上至皆大恐將謂循五代之弊縱士卒剽掠既見上號令兵士即時解甲歸營市井不動略無搔擾衆皆大喜又聞上驛前誠約之事滿城父老皆相賀曰五代天子皆以兵威強制天下未有德信黎庶者今上踐阼未終日而有愛民之心吾輩老矣何幸見真天子之御世乎自唐末至五代藩方節制

皆不稟朝命上踐阼豁達大度推赤心以待之繇是諸
路節將懷德畏威不敢跋扈歲時貢奉無闕朝廷亟召
亟至皆執藩臣之節甚恭識者知德威之行矣太平之
基立矣又曰杜太后度量恢廓有才智國初內助為多

上初自陳橋即帝位進兵入城人先報曰黥檢

上時官為黥檢

已作天子歸矣時后寢未興聞報安臥不答晉王輩皆

驚躍奔走出迎

晉王後受命是為太宗

斯須有上親信人至入白

后后乃徐徐而起曰吾兒素有大志果有今日矣俄頃

上至見后於堂上衆皆賀之惟后愀然不樂上甚訝之左右進白后曰臣聞母以子貴自古如此后子今作天子胡為不樂后謂上曰吾聞為君不易且天子者致身於兆庶之上若治得其道則此位可尊或失馭則欲為匹夫不得是吾所以憂也子宜勉之上再拜曰謹受教又曰乾德開寶間天下將大定惟河東未遵王化而疆土實廣國用豐羨上愈節儉宮人不及二百猶以為多又宮殿內惟掛青布綠簾緋絹帳紫紬褥御衣止赭袍

以綾羅為之其餘皆用純絹晉王已下因侍宴禁中從容言服用太草草上正色曰爾不記居甲馬營中時耶上雖貴為萬乘其不忘布衣時事皆如此又曰開寶末議遷都於洛晉王言京師屯兵百萬全藉汴渠漕運東南之物贍養之若遷都於洛恐水運艱阻闕於軍儲上省表不報命留中而已異日晉王宴見從容又言遷都非便上曰遷洛未已久當遷雍晉王叩其旨上曰吾將西遷者無它欲據山河之勝而去冗兵循周漢之故事

以安天下也晉王又言在德不在險上不答晉王出上
謂侍臣曰晉王之言固善姑從之不出百年天下民力
殫矣又曰上享天下十七年左右內臣有五十餘員止
令掌宮掖中事未嘗令預政事或有不得已而差出外
方止令幹一事不得妄採聽他事奏陳天下以為幸開
寶末差內臣禱名山大川俄有黃門於洞穴採得怪石
有類羊形以為異而獻之上曰此是墳墓中物何用獻
為命碎其石仍杖其黃門逐之不受內臣所媚皆如此

又曰乾德初浙西錢俶來朝上待之甚厚俶方到闕自
晉王丞相及中外臣僚有表章五十餘封請留俶上曰
錢俶在本國歲修職貢無闕今又委質來朝若利其土
宇而留之殆非人主之用心何以示信於天下也奏俱
不納俶辭歸國賜與金幣名馬之外別以黃絹封署文
書一角付俶曰候至本國開之仍諭俶曰朕知卿忠勤
若朕嘗安健公則嘗有東南他人即不可也俶感泣拜
謝而去俶至錢塘開把中文字乃是晉王丞相已下請

留牋章五十餘封，倣大驚，以表稱謝。上存心仁信，類如此。嗚呼！王內翰前輩諸公，識與不識，皆尊師之曰：古之遺直也。伯溫晚生，得其私書於海內，兵火之餘，取可傳者列之。

李文定公迪為學子時，從种放、明逸先生學。將試京師，從明逸求當塗公卿薦書。明逸曰：有知滑州柳開、仲塗者，奇才善士，當以書通君之姓名。文定携書見仲塗，以文卷為贄，與謁俱入。久之，仲塗出，曰：讀君之文，須沐浴。

乃敢見因留之門下一日仲塗自出題令文定與其諸
子及門下客同賦賦成驚曰君必魁天下為宰相令門
下客與諸子拜之曰異日無忘也文定以狀元及第十
年致位宰相仲塗門下客有柳某者後官至侍御史文
定公命長子東之娶其女不忘仲塗之言也文定所擬
賦題不傳如王沂公曾初作有物混成賦識者知其決
為宰相蓋所養所學發為言辭者可以觀矣程明道先
生為伯溫云

寇萊公既貴因得月俸置堂上有老嫗泣曰太夫人捐館時家貧欲絹一匹作衣衾不可得不及公之今日也公聞之大慟故居家儉素所臥青帷二十年不易或以公孫弘事靳之公笑曰彼詐我誠尚何愧故魏野贈公詩曰有官居鼎鼎無宅起樓臺後北使在廷目公曰此無宅相公耶或曰公頗專奢縱非也蓋公多典藩於公會宴設則甚盛亦退之所謂甌石之儲嘗空於私室方丈之食每盛於賓筵余得於公之甥王公丞相所作公

墓誌公遺事如此

張文定公齊賢河南人少為舉子貧甚客河南尹張全義門下飲啖兼數人自言平時未嘗飽遇村人作願齋方飽嘗赴齋後時見其家懸一牛皮取煮食之無遺太祖幸西都文定公獻十策於馬前召至行宮賜衛士廊食文定就大盤中以手取食帝用拄斧擊其首問所言十事文定且食且對略無懼色賜束帛遣之帝歸謂太宗曰吾幸西都為汝得一張齊賢宰相也太宗即位齊

賢方赴廷試帝欲其居上甲有司置於丙科帝不悅有旨一榜盡除京官通判文定得將作監丞通判衡州不十年位宰相矣

河南節度使李守正叛周高祖為樞密使討之有麻衣道者謂趙普曰城下有三天子氣守正安得久未幾城破先是守正子婦符彥卿女也相者謂貴不可言守正曰有婦如此吾可知矣叛意乃決城破舉家自焚符氏坐堂上不動兵入叱之曰吾父與郭公有舊汝輩不可

以無禮見加或白公命柴世宗納之後為皇后三天子
氣者周高祖柴世宗本朝藝祖同在軍中也麻衣道者
其異人乎

華山隱士陳搏字圖南唐長興中進士游四方有大志
隱武當山詩云他年南面去記得此山名本朝張鄧公
改南面為南嶽題其後云蘚壁題詩志何大可憐今老
華圖南蓋唐末時詩也常乘白驪從惡少年數百欲入
汴州中途聞藝祖登極大笑墜驪曰天下於是定矣遂

入華山為道士葺唐雲臺觀居之藝祖召不至太宗召以羽服見於延英殿顧問甚久送中書見宰輔丞相宋琪問曰先生得玄默修養之道可以教人乎曰搏不知吐納修養之理假令白日冲天亦何益於聖世上博達今古深究治亂真有道仁明之主正是君臣同德致理之時勤心修煉無出於此琪等稱歎以其語奏帝益重之帝初問以伐河東之事不答後師出果無功還華山數年再召見謂帝曰河東之事今可矣遂克太原帝以

其善相人也遣詣南衙見真宗及門亟還問其故曰王
門廝役皆將相也何必見王建儲之議遂定後賜號為
希夷先生真宗即位先生已化因西祀汾陰幸雲臺觀
謁其祠加禮焉帝知建儲之有助也嗚呼世以先生為
神仙善人倫風鑒淺矣至康節先生實傳其道於先生
之細者尚以比漢四皓云

种先生放字明逸隱居終南山豹林谷聞華山陳希夷
先生之風往見之希夷先生一日令洒掃庭除曰當有

嘉客至明逸作樵夫拜庭下希夷挽之而上曰君豈樵者二十年後當為顯官名聳聞天下明逸曰某以道義來官祿非所問也希夷笑曰人之貴賤莫不有命貴者不可為賤亦猶賤者不可為貴也君骨相當爾雖晦迹山林恐竟不能安異日自知之後明逸在真廟朝以司諫赴召帝携其手登龍圖閣論天下事蓋眷遇如此及辭歸山遷諫議大夫東封改給事中西祀改工部侍郎希夷又謂明逸曰君不娶可得中壽明逸從之至六十

歲卒先是希夷為明逸卜上世葬地於豹林谷下不定
穴既葬希夷見之言地固佳安穴稍後世世當出名將
明逸不娶無子自其姪世衡至今為將帥有聲希夷既
上表定日解化於華山張超谷石室中明逸立碑敘希
夷之學曰明皇帝王伯之道云嗚呼仙者非希夷而誰
歟

錢若水為舉子時見陳希夷於華山希夷曰明日當再
來若水如期往見有一老僧與希夷擁地鑪坐僧熟視

若水久之不語以火箸畫灰作做不得三字徐曰急流中勇退人也若水辭去希夷不復留後若水登科為樞密副使年才四十致政希夷初謂若水有仙風道骨意未決命老僧者觀之僧云做不得故不復留然急流中勇退去神仙不遠矣老僧麻衣道者也希夷素所尊禮云


康節先生嘗誦希夷先生之語曰得便宜事不可再作得便宜處不可再去又曰落便宜是得便宜故康節詩

云珍重至人嘗有語落便宜是得便宜蓋可終身行之也
李文靖公作相嘗讀論語或問之公曰沆為宰相如論
語中節用而愛人使民以時兩句尚未能行聖人之言
終身誦之可也

咸平景德中李文靖公沆在相位王文正公旦知政事
時西北二方未平羽書邊報無虛日上既宵旰二公寢
食不遑文正公歎曰安得及見太平吾輩當優游矣文
靖公曰國家有強敵外患足以警懼異日天下雖平上

意浸滿未能高拱無事某老且死君作相時當自知之
無深念也及北鄙和好西陲款附於是朝陵展禮封山
行慶巨典盛儀無所不講文靖已死文正既衰疲於贊
導每歎息曰李文靖真聖人也故當時謂文靖為聖相
呂文穆公諱蒙正微時於洛陽之龍門利涉院土室中
與溫仲舒讀書其室中今有畫像有詩云八灘風急浪花飛手
把魚竿傍釣磯自是釣頭香餌別此心終待得魚歸又
云怪得池塘春水滿夜來雷雨起南山後狀元及第位

至宰相溫仲舒第三人及第官至尚書公在龍門時一日行伊水上見賣瓜者意欲得之無錢可買其人偶遺一枚於地公悵然取食之後作相買園洛城東南下臨伊水起亭以饅瓜為名不忘貧賤之義也



聞見錄卷七